

三論同卷

逸六

大乘法界無差別論

提婆菩薩破楞伽經中外道小乘四宗論
提婆菩薩釋楞伽經中外道小乘涅槃論

大乘法界無差別論

堅 慧 菩 薩 造

唐三藏法師提雲般若等奉 制譯

稽首菩提心 能為勝方便 得離生老死
病苦依過失

永樂北藏

大乘法界無差別論

第一〇五冊

菩提心略說有十二種義是此論體諸聰慧者應如次知所謂果故因故自性故異名故無差別故分位故無染故常恒故相應故不作義利故作義利故一性故此中最初顯示菩提心果令見勝利次則說彼所起之因然後安立此出生相及顯異名而無差別於一切位無有染著常與淨法而共相應不淨位中無諸功用於清淨位能作利益一性涅槃應知如是十二種義今此論中次第開闡何者名為菩提心果謂最寂靜涅槃界此唯諸

佛所證非餘能得所以者何唯佛如來能永滅盡一切微細煩惱熱故於中無生永不復生意生諸蘊故無老此功德增上殊勝圓滿究竟無衰變故無死永捨離不思議變易死故無病一切煩惱所知障病及與習氣皆永斷故無苦依無始時來無明住地所有習氣皆永除故無過失一切身語意誤犯不行故此則由菩提心爲最上方便不退失因一切功德至究竟而得彼果彼果者即涅槃界何者爲涅槃界謂諸佛所有轉依相不思議法

身以菩提心是不思議果因如白月初分故今頂禮復次頌曰
能益世善法 聖法及諸佛 所依寶處因如地海種子
復次菩提心如地一切世間善苗生長所依故如海一切聖法珍寶積聚處所故如種子一切佛樹出生相續之因故如是已說菩提心果云何此因頌曰
信爲其種子 般若爲其母 三昧爲胎藏 大悲乳養人

復次云何此因積集應知如轉輪王子其中
於法深信為菩提心種子智慧通達為母三
昧為胎藏由定樂住一切善法得安立故大
悲為乳母以哀愍衆生於生死中無有厭倦
一切種智得圓滿故云何自性頌曰

自性無染著 如大寶空水 白法所成就
猶如大山王

復次應知此菩提心因積集已有二種相謂
離染清淨相白法所成相離染清淨相者謂
即此心自性不染又出客塵煩惱障得清淨

譬如大摩尼寶虛空水等為灰垢雲土所覆
翳時雖其自性無所染著然由遠離灰等故
令火等得清淨如是一切衆生自性無差別
心雖貪等煩惱所不能染然由遠離貪等故
其心得清淨白法所成相者謂如自性清
淨心為一切白法所依即一切白淨法而
成其性如說須彌山衆寶所依即以衆寶而
合成故云何異名頌曰
至於成佛位 不名菩提心 名為阿羅訶
淨我樂常度 此心性明潔 與法界同體

如來依此心 說不思議法

復次此菩提心永離一切客塵過惡不離一切功德成就得四種最上波羅蜜名如來法身如說世尊如來法身即是常波羅蜜樂波羅蜜我波羅蜜淨波羅蜜如來法身即是客塵煩惱所染自性清淨心差別名字又如說舍利弗此清淨法性即是法界我依此自性清淨心說不思議法云何無差別頌曰
法身衆生中 本無差別相 無作無初盡
亦無有染濁 性空智所知 無相聖所行

一切法依止 斷常皆悉離

復次此菩提心在於一切衆生身中有十種無差別相所謂無作以無爲故無初以無起故無盡以無滅故無染濁以自性清淨故性空智所知以一切法無我一味相故無形相以無諸根故聖所行以是佛大聖境界故一切法所依以染淨諸法所依止故非常以是雜染非常法性故非斷以是清淨非斷法性故云何分位頌曰
不淨衆生界 染中淨菩薩 最極清淨者

是說爲如來

復次此菩提心無差別相故不淨位中名衆生界於染淨位名爲菩薩最清淨位說名如來如說舍利弗即此法身爲本際無邊煩惱藏所纏從無始來生死趣中生滅流轉說名衆生界復次舍利弗即此法身厭離生死漂流之苦捨於一切諸欲境界於十波羅蜜及八萬四千法門中爲求菩提而修諸行說名菩薩復次舍利弗即此法身解脫一切煩惱藏遠離一切苦永除一切煩惱隨煩惱垢清

淨極清淨最極清淨住於法性至一切衆生所觀察地盡一切所知之地昇無二丈夫處得無障礙無所著一切法自在力說名如來應正等覺是故舍利弗衆生界不異法身法身不異衆生界衆生界即是法身法身即是衆生界此但名異非義有別云何無染頌曰譬如明淨日 爲雲之所翳 煩惱雲若除法身日明顯 此復云何於不淨位中現有無量諸煩惱而不爲染譬如日輪爲雲所覆而性常清淨此

心亦爾彼雜煩惱但爲客故云何常恒頌曰
譬如劫盡火 不能燒虛空 如是老病死
不能燒法界 如一切世間 依虛空起盡
諸根亦如是 依無爲生滅
復次云何於此現有生老死而言是常譬如
虛空雖劫災火起不能爲害法界亦爾是故
經言世尊生死者但隨俗說有世尊死者諸
根隱沒生者諸根新起非如來藏有生老死
若沒若起世尊如來藏過有爲相寂靜常住
不變不斷故云何相應頌曰

如光明熱色 與燈無異相 如是諸佛法
於法性亦然 煩惱性相離 空彼客煩惱
淨法常相應 不空無垢法
復次云何未成正覺而言於此佛法相應譬
如光明熱色等與燈無有異相諸佛法於法
身亦如是如說舍利弗諸佛法身有功德法
譬如燈有光明熱色不離不脫摩尼寶珠光
色形狀亦復如是舍利弗如來所說諸佛法
身智功德法不離不脫者所謂過恒河沙如
來法也復次如說有二種如來藏空智何等

為二所謂空如來藏一切煩惱若離若脫智
不空如來藏過恒河沙不思議諸佛法不離
不脫智云何不作義利頌曰

煩惱藏纏覆 不能益衆生 如蓮華未開

如金在糞中 亦如月盛滿 阿脩羅所蝕

復次衆生法身既與如是功德相應何故無
有如來德用應知此如蓮未開諸惡見葉共
包裹故如金墮廁在於覺觀糞穢中故如滿
月被蝕我慢羅睺所執取故如池水被濁貪
欲塵土所混雜故如金山被翳瞋恚泥垢所

封著故如虛空被覆愚癡重雲之所蔽故如
日未出在無明習氣地中故如世界未成在
六處水大藏中故如雲無雨相違緣現前故
總為頌曰

如蓮金等未開顯 佛體客塵翳亦然

是時功德不自益 反此則能為大利

云何作義利頌曰

如池無垢濁 如蓮大開敷 亦如上好金

洗除衆糞穢 如虛空清淨 朗月星圍繞

離欲解脫時 功德亦如是 譬如日明現

威光徧世間 如地生衆穀 如海出衆寶
如是益衆生 令從諸有脫 了知諸有性
而起於大悲 若盡若不盡 斯皆無所著
佛心如大雲 住於實際空 三昧總持法
甘雨隨時降 一切諸善苗 因此而生長
此偈中義與前相反應知則是清淨法身遠
離客塵衆患故成就自性功德故證斯法者
則名如來應正等覺於常住寂靜清涼不思
議涅槃界恒受安樂爲一切衆生之所歸仰
云何一性頌曰

此即是法身 亦即是如來 如是亦即是
聖諦第一義 涅槃不異佛 猶如冷即水
功德不相離 故無異涅槃
若如來法身異涅槃者經中不應作如是說
如彼頌言

衆生界清淨 蓮六 應知即法身 七 法身即涅槃
涅槃即如來

復次如有經言世尊即此阿耨多羅三藐三
菩提名涅槃界即此涅槃界名如來法身世
尊無異如來無異法身言如來者即法身也

復次應知此亦不異苦滅諦是故經言非以苦壞名苦滅諦言苦滅者以從本已來無作無起無生無滅無盡離盡常恒不變無有斷絕自性清淨遠離一切煩惱藏具足過恒河沙不離不脫智不思議諸佛法是故說名如來法身世尊即此如來法身未離煩惱藏說名如來藏世尊如來藏智是如來空智世尊如來藏者一切聲聞獨覺本所不見本所不證唯佛世尊永壞一切煩惱藏具修一切苦滅道之所證得是故當知佛與涅槃無言差

別譬如冷觸不異於水復次應知唯有一乘道若不爾者異此應有餘涅槃故同一法界豈有下劣涅槃勝妙涅槃耶亦不可言由下中上勝劣諸因而得一果以現見因差別果亦差別故是故經言世尊實無勝劣差別法證得涅槃世尊平等諸法證於涅槃世尊平等智平等解脫平等解脫知見證得涅槃是故世尊涅槃界者名爲一味所謂平等味解脫味也

大乘法界無差別論